

四庫全書

集部

欽定四庫全書

懷星堂集卷二十六

明 祝允明 撰

紀叙

跋宋高宗付岳武穆手敕

宋藝祖得天下雖不以兵車要為英武之君也至於端王以浪子而失之於前康王以昏懦而不能全復之於後二君之文藝皆有可觀獨無為國之才耳丹青翰墨藝祖豈有是哉而天下得失之效乃爾何哉二君明其

小藝祖明其大也此紹興與岳少保手救中間付屬之重處分之均期望之深非愚者所能然檜譏而岳死於前救猶兩人由其明小故反而大闔焉回視厥祖所以用曹彬趙普與斥雷德驤之事其得失粲然矣救為光祿華公汝德歲不獨興君子之歎其亦君人者之永鑒乎

跋宋高宗付岳武穆手劄石刻

由三代而後先君蒙塵失國而繼體者中興則其賢不

肖率由以分然究其理道是不可以成敗論蓋縣乎其
智勇矣昔人有言項籍臨死歸恨天亡耀射殺追以示
非戰罪斯羽繆也彼以攻戰為取天下之務不知善戰
者乃將帥事取天下在仁智仁來遠人智收英傑羽不
知也斯言政可以為若喻蓋創業以仁智中興以智勇
校然矣由三代而後試舉數世以參伍之蓋如元始毒
建安禪懷愍執天寶犇以至於徽欽之狩者彼昭烈元
帝卒不全復版章肅宗幸復而有間然唯光武為能盡

道究而論之則智勇深淺有亡之間而已矣智非鈎籍
陰謀勇非戰克攻取自其秉不共戴天之大義以為智
之根本而至於擇相簡將相時審勢知幾決策燭姦破
詐察君子小人之分嚴理欲界至之辨皆智也自夫厲
卧薪味膽之苦志以為勇之根本而至夫訓武練兵信
賞必罰任賢去邪不為勢回利疚皆勇也視權謀攻戰
而大者也是道也得之完者其效亦完而譽騰亦久漢
世祖是也得之而未完效亦視之而譽亦視之昭烈元

帝肅宗是也若建炎之人品其去光武遠矣校諸蜀晉與唐疑可伯仲而實不及焉何也智之大者不及也昭烈之任孔明晉元之任茂弘肅宗之任長源則可謂不貳者矣凡其武功之耆繇廟謨之定廟謨之定智勇是也其有偏全之間者則所謂成敗之天而其後來之得失又係乎既平之後之敬怠此別一理也若高宗者則異矣其君臣之間日夕之所論議未始不以中興為辭蓋不勝其紛厖錯雜前三君之時不聞費冗若是也而

效卒不逮焉豈非智勇之大者未聞乎智勇之大者蓋如彼而高宗昧焉宜夫顛之倒之自壞以資敵而委其事於豐敗大恥終其身與子孫數世而莫之贖也亦可痛哉岳檜之不同立誰不知之談者迄于今不二而反復其故職由諸此有國與家者宜不是鑒哉而儒生斷史案亦可以旁證互佐而得其情矣武穆受建炎手敕甚多當時皆入檢括此一紙壽春帖不知何一好事者鑱之石正足以重鵬舉之忠寃悼九哥之昏風吾姻氏

沈潤卿治地得之以表于時諸文章家題述已富予綴
此論相參焉

跋宋賜江賓王進士出身敕

句曲江秀才永年為宋進士賓王十三世孫持賓王所
被敕及同年小錄示予賓王紹興十八年登第注授左
迪功郎揚州泰興主簿官終翰林編脩江氏胄蕃且華
望其邑然賓王行業閱履他無考見其詳尋縣志無傳
志近時所為極蕪陋不足觀即問之永年亦曰歷世歲

先遺物甚多三厄於火遂失十八九所知者如熙寧九年進士適道紹興十二年進士漢建炎三年鄉貢進士通道至大二年鄉貢進士鎮國初處士東輩與賓王畧著於志而凡公牒傳誌金石之屬具守數百年而一旦亡之又傳兵戈時失之溝瀆惟此敕錄并他房所留世系圖巨軸在爾即錄亦已焚其一後造室於舊壁中得之蓋當時有二本一手傳於外一真壁乃知昔人藏保之圖亦已周謹然非易牆亦亡耳宋人敕告傳于今甚

多教中語無必論嘗謂前代命官必有詞至卑遠若降
謫亦然雖似過文然上下間情文固宜頗近俞拂之風
本朝極簡重雖高位重寄若非綸綍之被不過佩片紙
往莅事行即上之使有豐德茂勲而非私家傳誌之播
則一時後輩亦往往不諦其踐履況後世乎此亦事之
宜討論者也雖然士果志乎建德植業而樹聲亦固不
以此就如賓王令聞之存亦不繫斯一卷也永年好學
善文其耀世華祖者已自立行當褒然此固其弓玉亦

紳盤也與

跋趙子昂書文賦

觀古人文可得書法觀書可得文法此具目者之能事也此卷所具亦多矣

跋趙書團扇賦

子昂書團扇賦近來頓見兩本此小字者先出精微妙麗所謂不能贊一辭

跋趙書韓詩

韓公山石句浩爛豪擅非細軟筆墨能發之而學士此
筆亦復襟宇跌宕情度濃至脫去平常姿媚百倍譬如
聖后封岳省方德容正大裾袞和博擯相明習儀履安
閑所謂從心所欲不踰矩可望不可學也

跋趙松雪管夫人與中峯手帖

右趙承旨手牘十一紙魏國管夫人一紙皆與天目幻
住公者承旨所云悉為夫人沒後與住商評欲修事薦
嚴時承旨老矣音辭宛惻讀之可為興感不知當時本

老答語何以寫其憂也夫人以書般若得公讚歎致謝云云皈依之誠尤為迫切本之徒永定通作一卷今歸黃輕車間以相示余謂三士咸從菩薩地來所謂應以此丘宰官信女身而得度者因緣聚會乃如此今皆還淨土矣學士夫人不能釋然於現在之時予乃為勸破於過去之日相對一笑摩挲移日不獨以其翰墨之妙而已也

跋錢舜舉明皇擊梧桐圖

趙飛燕舞在掌上楊玉環比昭陽微有肌為盤中舞宜也謝阿蠻等奏樂其旁而潞州別駕所按與之諧則其素習可知雖微楊玉環獨無一盤中之人哉來漁陽之鼙鼓不專在羽衣一婆婆也吾惜楊玉環受誣已久漫因錢吳興為一舉末減之手

題顧司封藏舊人畫卷

舊人筆雖有高下必走法度中其下者凡耳今人縱佳者多以脫畧法度自為高沈畦滅徑指作意外境直愚

耳凡可也愚不可也此段不知何舊人作

跋石勒問法圖

右石勒問法於佛圖澄圖一段元人遺製也自騰蘭來法輪通流東華無礙時諸比丘亦接現神通而十六國紛亂之際最盛姑以西來者言之如鳩摩羅什佛陀那舍竺佛念之在姚秦菩提達摩之在拓跋魏曇無讖之在沮渠涼菩提流支之在元魏求那跋陀羅之在劉宋等或以禪定或以呪術或以翻譯隨機應緣未可悉稱

如帛公之在石趙尤神也當時諸國之君類皆憍慢頑
凶在十不善業中為生活而往往崇事此數公者世恒
謂神者莫盛於竇誌崇者莫盛於蕭武而禍身敗國亦
莫甚焉則其餘可知矣抑不然也釋伽文自以逃儲棄
國而得道者其道成後謂其力可以利物福世猶之拾
芥而不以為能事也故從之者寧問以無生之法奉持
恭敬唯恐不得一聞而謂家國之濁惡非其所與非惟
不問而且懼其以此舍我也其於此猶所謂是不為也

非不能也吾儒之教自身而家國天下本末周具為法
判然而不相謀以正邪是非決之則有說矣而此則其
勢猶參贊位育莫非本具而唯以用行舍藏為至義蓋
視人而行已不以具而不遂者為累其勢然也延陵相
國捧揭日月著蔡四海其言治國平天下之道也予也
亦不佞佛亦不逃儒因其教而陳其事云爾矣唐子無
心應世之語畧見大致予也復一鼓喙亦聊以遊戲三
昧繪筆工能好事博雅者珍收之此嗣昭之美也無勞

于煩辭

題元人寫崔鶯鶯真

崔娘鶯鶯真像乃舊傳本非宋即元人名手之所摹也
予向者都下曾從一見之繼於膠城僧院中見一本大
畧相類妖妍宛約故猶動人第似微傷肥耳陶南村說
曾於武林見崔麗人遺照因命盛子昭臨一本且有趙
宜之等題詠甚詳此豈即其物歟盛君之臨本歟或好
事者重番盛本抑因陶說而想像之以暗中摸索而為

之者歟既識蔑面游藝之隙漫書以記吾曾云耳噫尤
物移人在微之猶不能當子之德不足以勝妖孽恐貽
趙顏之感姑未暇引爾歸丹青也

跋元末諸人帖

由元末入國初一時文學無盛於浙西此皆遺陳秩維
寅如倪瓚元鎮王蒙叔明謝應芳子蘭楊基孟載張羽
來儀虞堪勝伯陳植叔方郊韶九成王行止仲其著者
他不啻十倍羣材茂發蒙古既不能有零落蔓草或幸

顯于天朝未之盡也卷箴尚古覽之既多室蘭之羨亦
饒黃楊之歎耳

跋太宰王先生箴饒參政書罪言後

杜舍人以當時措置亡術失山東巨鎮作罪言信善論
大事者邪饒參政以高才受藩寄與僭據者居其時又
不若唐季其亦有牧之之隱憂乎然又不敢有所論述
因寓懷於揮寫間是固非漫浪為之者矣太宰太原公
取而珍玩之蓋特重其書耳其事其文皆非今日所取

者噫是亦公錄善庸藝之餘旨歟

二研志

少宰太原公示客二研允明獲從觀焉其一形中規有柄可提銘以璧海而系之辭魏文靖公遺也一正圓若鏡山人耕土得之以呈公而公自銘者也二石皆良材固當甲品然而材之良不止是獨是著焉以其屬之公也即公之蓄固亦不止是獨是著焉以公嘗取而表之也天下之物之良而繫乎取而表之斯著焉者亦多矣

乎夫流發磅礴而異厥鍾者天之氣也凝合以成質粹
雜高下不可以遷者地之宜也隨其稟以效用過則敗
嗇之而不究者物之材也求之乃獲表之乃貴利器以
善事者人之術也天下之撰則皆若是也矣而豈惟二
研然哉於是亦有以察公之莅斯世也夫研之過取而
表也以放之則山龍一人以卷之則袞撻百王此其不
負公者如以辭而已也殆非研之所以望於公而自効
者也非天地之所以生研而屬之公之意也小子敢云

跋元末國初人帖

元至國初善書者甚多此冊數人華光祿歲令試因所
聚取其尤者為評曰虞集如鹵簿禮官贊尊應節結束
弄姿稍遠大雅鮮于樞如三河壯俠長袖善舞豪鷲自
擅時落俗體鄧文原如疊甃層城不勝沈實饒介如時
花沐雨枝葉都新張雨如道士醮祠雖禮而野俚瓚如
金錢野菊畧存別韻揚維禎如吳歌楚些時露方言陳
璧如有若據坐尚有典刑宋克如初筵自曩忽見三代

解縉如盾郎執戟列侍明光

題王安道華山圖後

畸叟學術淵邃吐露竒傑惜不見其至文士輩傳述仰
重固知其不沒沒竟獨從其醫理之籍推測云爾滄洲
武將軍家藏得其華山圖子凡數十段詩文數百首首
尾爛然整完發卷便攜人到異境詩句巉窅摸象深古
叙記脫邁人間世藝事有如此者俊哉近代當有幾何
許西岳雄詭精神與人蹤迹言語間相警發者韓公杜

老潘子陳先生后乃始得叟

跋沈書徐公歸田賦

祖宗崇文教詞林鉅公黼黻皇度者後先照映至宣英
間而極盛大理先生之翰墨外大父武功公之文章皆
一時獨步也然作者能事類多兼之徐之書沈之辭又
稱盡美此卷所具蓋其勢若勅敵而其妙若合璧者矣
吾友顧啟衷寶愛甚至其得之固多矣抑今日文化彌
盛君之志其將兼而有之以續國華於無窮者歟

跋俞陳二先生遺橐

吳故稱多材蓋不特以一藝云然醇德雅操篤行善政
每多兼之至於文學其一也有如都昌五經二先生一
時師友倡和嘻其盛矣今鄉後進多知其學耳若二先
生之德之操之行與都昌之政則皆兼而有之謂之君
子儒可也謂之卓行可也謂之循吏可也而豈一材之
云乎若夫文章之間慎守槩矧有德之言則既知之矣
而何足以盡之因閱子容所藏二先生遺文輒系云爾

記錢長史荅鄒處士書事

初洪武間錫山鄒處士伯陽有昆季五人曰某某伯陽
惇同氣署其堂曰聚玉取庾氏金昆玉季語也伯陽廣
交納滕尚書用亨為作篆書刻枋間而同邑錢長史仲
益時為太常博士伯陽以文記屬之太常報書云吾長
官少卿高公士敏及侍講方公希直方操今日文印且
不苟作其言能重輕人非其筆也無足以崇茲堂者既
為請之高公業已許矣須其成也則更求諸翰苑史館

國監諸詞員詩之而王紀善尹實篆題王舍人孟端為
圖庶乎可也錢語如此第不審當時竟就緒否或得而
復失之否伯陽既往三傳以至今時用時用失親蚤於
時故堂之存者惟業業家東偏空壁幾堵耳子孫亦惟
知家有聚玉堂而已文紀之徵漠如也他日時用偶語
諸人乃得滕扁於一鄰家已而喪他故劄又得錢之報
章三數紙其間道堂名事者屢屢大率如前所云時用
近鼎構家舍咸請予為題名而以故扁示屬摹而大之

以持揭於一堂復倩述錢書以見當時事勢為曉後來
乃為備紀復系之曰友于之重文章之重友道之重茲
堂所繫信善矣以今百年上下隱顯之間而言之吾固
善乎昔人之振當時也吾又善乎昔人之望後人也吾
既善乎今人之承昔人也吾又善乎今人之望後人也
若夫後人之於今人也吾又未知其善之何如也時用
悠悠吾能引之引之於言者如斯而已矣

跋侍御成公紀行集

先公舉正統己未進士其年僅百人其後以德操材畧
政業文學顯耀朝野登列史籍者蓋不可勝紀始以文
學言如侍御毘陵成公始終尚書文通華亭錢公溥文
僖錢唐倪公謙都憲錫山楊公璿大參崑山張公和修
撰吳邑施公槃尚書餘杭鄒公榦都憲三山林公聰尚
書關西楊公鼎大尹吳江莫公震與先公皆倡和廢載
美哉颯颯乎鳴于遠也侍御文通先公尤以雅道自負
交裁互贊推許不易文通謂先公古選尤傑稱為祝選

先公所稱諸公者各有在其於侍御甚至也久明免時
習聞之後來所見諸家集亦多獨未得侍御也比道平
原侍御諸孫尚書冬官屬都水君周始以紀行編見惠
歸舟亟誦之一月三千里至家未嘗一日廢甚矣公之
能言也蓋其中誠抱氣操勤勞國家寢食子美又所歷
秦隴湘桂迹亦躅杜肺腸耳目皆出沒開元天寶間故
其言與合者居然妙契與強捧心顰眉者殊當不長留
天地間邪然又意公不顯在是唐英之語蓋博參焉故

其他多與杜異而竟不嘗違唐又與後來媚宋者不同
科卞和知之不必為彼談也集有聶臨川大年敘道此
意而未盡小子喜遂昔望因題其後云爾正德辛未通
家兒長洲祝允明題

朱氏家藏手劄序

故山西按察僉事鈍菴先生雲間朱公沒後諸子咸紹
世業起科第躋膺仕游太學繩繩不匱間取公存時所
得交游寅宥諸公手墨彙裝為卷比太學君以其一示

允明題曰見似羹牆允明閱之皆簡牘也其間如文安
劉公主靜中丞揚公叔璣太守張公汝弼輩及先參政
公皆宿德鉅公餘亦一時名流凡數十通類多手翰太
學命允明序之允明竊多感焉諸札固皆訊答一時情
事非命題創意之製而詞情醇確視其他泛泛貢諛者
不同間或有及於君臣夫婦之典者讀之可見輔仁隆
禮友道藹然亦可以為衆勸而非獨其後人之宜重也
蓋公以名進士起家為侍御史乃遷西臬所莅聲績皦

然風裁澄耀又以其緒餘發於文藝春容詞林滌去俗
吏之塵故所與者無非文章政事勝流而與中丞及先
公契結特厚餘光逸響輝映三晉及乎恩賜養老優游
淞泖康享上壽以終而遺澤所需爰及諸君蔚然繼起
觀斯卷之題旨亦可以占一斑矣太學之孝秀端不可
揜而其榮達方始所以顯公者尤未可涯也至於餘風
所激以迨小子則祇益感愧而得師恩齊之力抑又多
矣命不可辭漫書以復且以祝其後此者益勿替引之

云爾

跋雪夜聯句

徵雪事於文如梁園之賦於武如蔡州之捷偉然者也
宋人之詠至詒時宰合閘之嫌雪繫時事有如此其言
可窺人又如此至吾中丞公與吾內外二祖武功參政
諸公所賦長句詞華情致又極一時之偉矣迨卒章曰
望已慰三農功尚脩六府嘻愛國憂民二言盡之此兼
將相事也時諸公皆在休散獨中丞方受國寄將建方

叔之勲宜斯言之出於公也後數十年為正德己巳端午日中丞孫勲示觀敬記

跋諸田藏賀氏帖

公宣名振父也美之名甫子也此為吳中賀氏二儒此帖與江陰諸田皆尋常還往雜事然其詞氣懇實則為厚往復諄益則為勤豪楮廉約則為儉厚與儉勤皆人所可法也

題馬刑曹畫草石後

清癡君赴地下修文之代僕常墮騷壇落星之淚今日
見此遺墨高木荆棘忽已移君土饅頭上轉為酸鼻

跋亡友劉嘉緒秀才手帖

協中赴長吉之召久矣僕常哭東南死却靈氣今日在
孫氏又復酸鼻見此遺玉

書文選呂大夫祖邦夔詩卷後

詩有以時異者繇漢魏迄今代自不同唐一朝且四三
變焉有以地異者周太師歌列國風延州子能辨之今

之能言者多矣天官大夫呂公夔獨不逐時地雷然同也其能言之尤與所謂豪傑也已此數卷中咄咄廟唐賢之壘而奪其氣可窺者或夷澹為輞川或木強為昌黎或雄擅為杜陵其合處往往亂之

寫各體書與顧司勳後系

僕學書苦無積累功所幸獨蒙先人之教自髫髻以來絕不令學近時人書目所接皆晉唐帖也然不肖頑懶畧無十日力今效諸家裁製皆臨書以意構之爾知者

乃或妄許為能書殊用愧恨而已此在建康為顧司勳
所強黃庭蘭亭急就章草二王歐顏蘇黃米趙追逐錯
離時迫歸程無暇豫之興又乏佳筆只饒得孺子態耳
欲且捲去司勳臨之勢有不可姑記日月爾後倘有餘
力期書一二來幸肯換之

跋為葛汝敬書武功遊靈巖山詞後

外祖武功公為此遊此詞時允明以垂髫在側於斯僅
五十年矣當時縉紳之盛合并之契談論之雅游衍之

適五十年中予所接遇皆不復見有相似者真可浩歎
獨此詞士口盛傳風趣常新又可喜耳會閒舟作圖倩
書其顛因系此感如閒舟瀟散得此一段情味於辭墨
間蓋自有甚樂者又閒舟守道簡古其所得復有在此
外鄉郡美風前後輩綴旒亦嘗有在閒舟耳

戴文進畫菊贊

有明畫家推錢唐戴生筆墨淋漓以雄老特名少作花
草紅翠媚榮忽復見此歲之毛卿丹黃交加與石爭廉

稜竒哉秀哉亦如夸妍寫冶宋廣平我思菊黨陶冷陸
野故是鐵石朋戴史得其顏毛子同其情也哉

題池州章汝愚秀才葺履吉九華山歌

九華之勝余與履吉父好同好而未見恨亦同余數往
來池陽阻俗而止饒恨矣汝愚寢食其中又廣之於吳
吳山水不多避舍汝愚兼得之又得履吉父瓊玖盈懷
何汝愚得之已富余二人之劣耶系之曰九華吾不得
而見之矣得見汝愚者斯可矣汝愚秀而敏華而雅吾

得多於見九華矣

書相人金生卷後

金生以相人鳴久一日以書介走堂下延之閱書已進
數大軸復閱之皆一時名貴所贈言侈其富而重其重
於人也坐定生請說相事乃止之非以矯異大帥子亦
素多學鄙事惟二三事不甚著意最不喜者宅墓相亦
不著意事也生既去旦旦謁問之亦欲予言曰不得不
已一得即往耳問所如曰將浮海遊朱崖亟回更欲北

走都西走陝臨諸邊塞廣聞見予固不自斲言然而以術則生已鳴一世以人則觀諸公之言亦得之矣故言無足重生將不言又拂其意漫墨卷尾凡生術既可重人又可重由是更莫有少生者予獨重其趣耳迹已半天下而猶飄飄然不自縈縛何壯歟何竒歟予行歸吳異時生或能來當別有相與言者非今日之所能盡也

為徐博士草書題卷後

右為邑博徐君書砮紙不納墨益乏神彩畧存大勢耳

然無乃醜面嫌脂粉乎

題草書後

予舊草書不甚慕山谷此入廣諸書帖皆不挈獨甲秀堂一卷在日夕相對甚熟畧不曾舉筆効之也昨歸吳知友多索書因戲用其法得者輒謂近之亦大可笑也此為抑菴寫過自視殊不佳然而抑菴亦且以為好也知如之何時為辛巳六月一日在天津官舟雨中

題草書後

多處不可多少處不可少大處不可大小處不可小曾
中要說話句句無不好筆墨幾曾知閉眼一任掃

原闕

欽定四庫全書

懷星堂集

五

題草書後

來索書者動粘數幅欲誇人為多得遙望興殘臨几手
怒安得而佳及此卷趨高而筆偶乏即用二文羊醜落
墨為之乙酉年九月六十六歲書

書與王希賢秀才寫卷後跋

循州無筆判案牘者江人販鬻殆不能勝山谷三錢雞
毛管王宗顏請書幸有一蘇毫亦下品也不得已用之
宗顏喜學書尤喜趙體因戲効漫揮唐風數篇還之余

不專師趙素無三日積功聊以慰其意耳平日東鄰一
旦欲似西家施豈能之哉

送楊松泉序

松泉鯁介不苟言笑又慷慨雅暢嘯歌超適至救人過
失侃侃法語不顧忌是為令人以與之周旋則益友也
余交最少而東西南北間之是故合懽鮮離憶多茲同
旅南海濱乃款密甚勤亦足以償所恨矣及同行又贈
之言夫方舟殆當兩月旦夜趣郝笑晤又烏復假此子

恐一抵故園更會稀矣故謀及言亦以自為也何則蓋
予最多過別君則箴規薄已從誰而拜昌乎所以拳拳
無舍君寧煩其辭存草時亦自展省若對面也一札既
呈雙漿遂舞夫偕行而有餞言亦古今所未有者新格
也

送進士秦君詩序

弘治八年天官侍郎延陵公丁太夫人哀來歸帝遣進
士台州秦君從簡來治墓明年事竣去公猶子奕合羣

從以及鄉諸詩人為詩送之蓋公於進士君意有勞謝而禮不得以言奕等得言而不盡諸人士得盡言之於是可觀禮可以觀詩可以觀貴族之教交黨之助矣至其所自則非進士君之有重也者有是也乎是重可以觀使華之皇皇矣僕勉將附詞而命其意無越於諸君也乃止而獨為序其事實云爾

送梁道夫序

別之事不一而為情殊有可重有可壯有可悅有可竒

有可戚後人一於戚非也大率別以倫典則宜重以遠
遊宜壯以清晏宜悅以觴歌宜竒戚者出乎四者之外
不得已者也何足言南海梁君道夫之尊人推守於浙
之嚴郡君來省之道出吳門未幾去吳士之辱君傾蓋
班荆者同餞諸金閭之外為詩遺之而託予序嘻君之
此行英山秀水登臨數千里足目雙飽時覓同襟弔古
獵幽開口論天下事高歌起舞歸力於上茲又轉而之
他其於別之勝蓋盡得之無不足者吾儕於是而重之

而壯之而悅之而竒之皆宜矣其不能無戚戚者情耳
何足言雖然君知之乎四者皆宜而最重者以寧親寧
親之外更有重者在乎挾治安策請纓扣闥謁帝承明
之廬而需其抱耳如是也尚何有於一解手耿耿乎哉
長風甚利劍光煜然君請往

懷星堂集卷二十六

欽定四庫全書

集部

懷星堂集卷二十七

詳校官監察御史_臣曹坦

中書_臣劉源溥覆勘

總校官庶吉士_臣何思鈞

校對官中書_臣王鍾泰

謄錄監生_臣張士琛

欽定四庫全書

懷星堂集卷二十七

明 祝允明 撰

紀叙

奉餞大方伯方公朝覲序

皇帝十有二載春月正元日受覲禮天下方伯十有三
牧帥郡公邑尹厥屬千官入闕下廣東大方伯方公先
半載戒行寅屬交從得以禮通者帥致寅餞則有言公
謂小子允明亦能言與小子惟古者言不以上下唯其

賢則言今小子愚不敢以道知小子不肖不敢以告賢
小子卑不敢以瀆尊小子賤不敢以煩貴小子不敢公
意未俞乃敢進曰古之善為送人之言者無若尹氏之
於樊侯然今言于公誠宜若是抑衆言率先之矣小子
思獨以所封之民望利者祈公為天子言求興之瘼求
瘳之庶不出位然是蕞然小土曷敢煩公為迺探百姓
之懷颺言曰天子必以已先民內重外留公置諸其左
右公則以式是百辟王躬是保出納王命賦政于外四

方爰發吾人第不耳目公儀音耳尚實被其風澤或
上念遠人載假公來終活我裔氓實唯更生德羣赤
子怙慈母也抑又不敢貪天之私以為我公必悠悠
我思小子既迷焉復矢詩謠于祖衢之下公庶幾聽
之詩云

粃粃公馬驟雲于天雲從龍兮雨彼八埏于行于南
終膏我田雲之繇繇兮不可從以旋兮我思不可誼
兮

東巡歸朝序

王制天下藩十有三治有易難廣外際海內楹以延領
天氣地物皆純駁參錯故稱治在易難間邇歲天下十
有三者稱并難大端有二以斯人良者窮暴者橫廣雖
缺九然二者兩各趨其趨實益實虛益虛於實於虛寔
日深厥難亦特明已小子乙亥來長古循一小壘蒿目
藩事蓋若此丙子春監察御史陳公來巡按此藩始至
不用察察自曝唯墨墨取前積事甲乙裁遣去若風馳

雷擊雨注自朝至于日中晁遂向晦不息越丙丁夜纔
少休以息衆日出而作胥錄案檄數夫手不給旦旦案
簿疊山晡而空焉譁噐牒投匭縞庭實目一過百斤一
聽曰吾豈弗志除貪蝥乳虎若狼貍輩歟此譁噐不情
是蝥虎狼貍尤也傾之政乃枯枯乃窳不可重楚之去
取真蝥虎狼貍焉者重辟之無怵焉群昉懾息以伏公
有洞秋毛之晰不灼于細有摧水岳之威不搖于微有
肉白骨之仁不姑于

缺一字

學殖山蘊文章葩發其君子

仰之孤鳳翔于千仞咸游德輝之內其小人闕之虎豹
踞于九巖弭伏林垆之外孔子曰知及之仁守之莊以
蒞之動之以禮又曰道之以德齊之以禮有恥且格是
則公之謂也於是廣封得公二三祀且不稱難國度近
臣不久外滿一歲當還柱下屬吏雷然以公之道若澤
鳴圖永焉小子隨之既而曰公之道其得以一地一時
止之乎蓋卑者分可止是公之官立乎朝可以舉乎天
下蒞乎天下可以舉乎朝此本職中事公又加舉者而

奚竝於此且缺二字言之蓋亦嘗知其舉乎朝者巍矣赫矣而非所敢盡

送憲副黃公按察八閩序

士用世者憂民之深無若持身之亮也建勲之華無若克念之誠也拯時之雄無若拔志之卓也皆美也以為有重輕又若不相類然然乎哉夫憂必行之則出入之防將弗遑審矣建必暴之則四三之術或莫知愧矣拯必遂之則枉直之度殆不免亂矣苟不為角階序耽肥

輕如是為之亦足施一時濟羣類耀聲於榮塗然而為
孔氏者不為也江陰小江先生黃公起家進士拜夏官
大夫道行偉然或弗諧於志還卧丘渚起僉廣東提刑
按察司事視民隱猶美疾寤寐不忘去治牢盆治戍人
屯田治分巡諸道事無為烈烈聲無不潤植槁枯剪削
蒼棘務至到協理愜心譚御世又物大裁制如拾梁擲
稗即用其譚罔乏庸其天下完鉅材而邦之幹楨也已
然而有出乎是衆或知而未殫寧空抱伊稷耒耜時憂

不以斯汨吾防寧建有弗章於人不能以自欺每浩歎
誠之艱立於今日仕軫之塵後驅者多先騰焉倏然嘯
紆未曾有淹駿之歎此何為者邪為孔氏云也丁丑夏
天子升之自嶺臬遷按察閩建而進位貳使行色之光
上有天王之寵音次有當路羣公之雅頌惟是有未盡
者曰亮曰誠曰卓為孔氏則然斯其本允明敢云

送王祿之會試詩叙

祿之與余家交久而姻密祿之少韞球囊錡輝未弗見

識者窺其國器也既從今翰林文仲子游為古人之文學久之日章不得以自揜今年乙酉稍以其時學領鄉舉將赴會試別我允明雖偃卧蓬林畏辟榮輒喜吾姻契之進取吾古人之文學之得伸也起而餞之時學在祿之不足譽其取上第易易時學最所極不過在能尋記後世所謂經義追逐而徇從稍以利才熟語發之得之者自有科舉來何可勝數此不足重祿之古學若山海出納無所窮際祿之往取上第若翰林當最稱去為

他官以此古學達之需如也子游曰君子學道則愛人
小人學道則易使此所謂古人之文學祿之既知之吾
茲以言餞非期祝祿之益示先知云也有詩系之

丹丘有彩鳳紫庭有神龍龍飛御乾極威鳳乃來從阿
閣覽垂衣蒲宮聽笙鏞五文離煥爛七始叶雖雖翊帝
宣文化四海扇薰風滄洲有鵬運觀爾盛遭逢

贈錢君醫效序

錢氏以顛顛醫世名吳中郡之人孩而活之以長者

不知幾千萬指也與余家友誼尤厚余之幼蓋亦活於其門之一人也近年來家有求活者則多之孔徵比余有二息孫每多疾遇大疾則奔告焉小疾則奔告焉孔徵聞告審其疾當視也則亟來視焉當藥則畀之服焉其來視也余輒從同視孔徵問證切脈察色揣肌審聲曰其來也以是其驗也若是其治也宜是為之校計乳哺之節涼燠之候襁負眠坐浚便之度與其母服食之宜尊諭周悉諄至然後使藥之蓋其用心施術匪伊良

醫師慈母賢保傅不易及也噫嘻世間人臣負主官怠
政厲民士背先師衆庶交欺賣至有天屬詐忍賊倫者
何如哉殆皆孔徵罪人孔徵術既精澤既廣不佞余語
語直以伸報德之懷而活人受福且為孔徵必之慶之
亦報德中意也

將赴京師與朱正言

余觀物之稟良於天而用殊也可勝道哉世多為咎於
人嗚呼天也今夫玉地理色澤不相遠為璣衡與天為

徒等而下之極至為含於死愚人以臭爛同歸又若同
作器飾或賢人小人貴賤重不重不同用之又若並雜
惡石抑揚倒錯施置其悖亂何如也今夫以士入衆庶
而商農且獵而仕獨且奈何哉余郡朱正守中蓋璣衡
玉也亦彫於玉人已而今在野余接之良粹之氣充充
爾嗚呼余觀今人妄庸顯而尊盡去礫也以視守中獨
且奈何哉吾茲當與守中別相為言之嗚呼守中無以
繆亂而敗脩矣抑或當有後期

杭州奎上人署書贊

雄穎偉墨突如其來云誰之為緇師宗奎佛有三昧散
在百觀子以其餘戲入書翰天宮寶樹截萬楨榦昆刀
瑚珠鈎鉞鏤鑽縱衡闔闢締構輾轉按規拊矩束帶頂
冕千力萬氣曳斫不斲平原風骨溥光首面耳目警聳
誰敢褻玩衆夫瞻仰老史作贊

三望一首贈杜子

吾鄉杜子鍾資甚秀志甚高世其醫業英年活人績已

不勝錄余愛之篤乃願之至作三望張之一望望濟其
世之美杜用醫著吳數世若某某前輩名老以文字傳
之甚富余望杜子齊之雖然杜子已武之不足止二望
望襲吾邦之休吳由宋元來最多上醫甲四方若韓盛
張王葛等皆挺然于時與北之張李南之朱戴齊不齊
亦各擅其時也然在子鍾度中不足止三望望陟于儒
儒中醫一事世將進醫援附儒非也儒之道通天人醫
握天人樞者也非聖不作非賢不行后代攻而弗振者

或良其伎而醜其行空抱聖術為不肖歸或習而庸累
道以入伎余望杜子奮興嗚于儒告子以其方中且徑
者可治一室將詩書周易戴禮春秋論語孝經公穀周
官爾雅注疏敷之凡學之問之思之辨之居之行之宋
以下傳解勿接目舉業士講論毋涉耳儒體立矣又將
史漢下十七史暇而擇閱之儒用達矣足外且又將
老列莊周荀揚國語淮南呂覽劉向書博吾識又將文
選文粹唐音鼓吹昌吾聲又將閤絳諸名帖升吾藝餘

無煩矣異時出列班序被金紫分中事不足語即在野
作鄉碩耆豈不偉哉

隱士贊

外彪日章豹華斑彪中立不倚華嵩嶙峋江湖有憂天
子不臣神隨下筆鬼莫窮文歲之清朝山川不貧

朱母大耋頌

家肥國阜爰有慈母妣嫗靜直令儀令色德氣垂委迺
生孝子以養以順以莫不致居適食豐滋味克克鼎鼎

春秋九十其崇龍在大淵獻月在玄枵吉日戊戌倣降
茲朝酒食衍衍言笑晏晏跪拜款款祈頌大奠大奠維
何維封溪之水淵德不撓流美不涖壽母維何維令人
周氏孝子維何長洲朱顥七十之孝終身是保孰歸孝
稱天子有詔文孫存理曾玄弁髦五世之澤膝抱而教
允明作頌以勸慈孝

蔣外生西樓讀易圖記

易道大者聖人以窮理盡性而至命天地大德生物聖

人位大寶前民開物成務革命無不在其細至行庭闕
戶封羊見豕亦爾其為物雖定於卦六十四爻三百八
十四而其為用斂千萬而一亦可取一而為萬億亦可
曰六十有四三百八十有四易也是讀易非得乎易者
也前之云大者聖人之讀易也細者百姓之讀易也聖
人得之百姓或得或弗得今之讀易者借倩之買名利
官祿耳長洲官校髦士蔣屋子重予中表外甥也家吳
淞之濱治業西樓中有為西樓讀易圖懸其壁生請予

著數語生質厚重而氣爽秀志功甚勤因畧語此而書
其上昔生叔祖予之姨之夫樂亭府君以易取科名而
修身為政咸得易道以為名卿大君子生畢時業蚤入
官紹前人而大今之道望聖賢為歸則亦予之勛子生
也層欄江湄西爽映帷敷策而呻拱襟以思旦斯圖夕
斯辭綽乎淵哉著龜

甘泉陸氏歲書目錄序

故浙江參政式齋陸先生文量以雅德碩學偉才高識

立功立言於憲孝兩朝間平生蓄書甚富既沒其子鄉
貢進士安甫彙列其目并已所得者通繫之凡為經史
子集合若干卷以示僕請序夫自高論者以皋夔稷高
無假讀書而視藏書為羨餘事不知書以道出道原於
天發於聖人皋稷聖人道所出亦書所出也皋稷不伺
書以聖而欲人皆聖不能以無書今人不皆皋稷而欲
舍書是將舍道道可舍乎哉又皋稷之聖著於典謨孔
子刪舊冊以成書有典與謨又安知皋稷時不當有書

也人飢寒則需食與衣病則需藥富則需珠玉異玩食
衣與藥以活身寶玩以娛耳目智於活身者猶能棄珠
寶以易食衣與藥故稻菽裘布參苓栝勃兼收焉而況
智於脩身以期配玄黃均為才者當舍書乎哉故人不
皆聖而聖人不能無書我不聖而不能舍書不能無飢
寒而不能舍食衣不能無病而不能舍藥者也矧藥活
身身活或不肖猶為不活書以脩身身脩道立生將參
玄黃夕死可矣又特藥等邪故善積者與積寶玩寧積

食衣藥積食衣藥無寧積書也式齋先生之書躬積而躬發之其德學才識所立已如是是將雖不迨皋稷而當其徒矣至以是教安甫安甫用以進取德學才識與先生惟肖異時所立當躅武繼響是積書之徵行之校著也已於乎無怪乎其愛重章表至如是也

陸啟明暘谷叙

林屋洞有三門同會一穴其左為暘谷下復有子洞通林屋之腹西包之要處也道書為左神幽虛之天其中

可居有金庭銀室啖有白芝乳泉讀有素書大道所存
即不能到居其表吞雲吐霞衣流冠石襟波袂月宿篋
鶴饑梅橘醉泉葬何地可以越此又勝者今有師相元
老才大夫士或隱君子高僧處其間足師友閱聞見以
長人品又勝者有佳子弟茂學業翹菁英將貴顯時代
於是居之乃至有數者之益如此由遂以號稱或從而
為之辭蹈厲奮紆豈不宜且美哉今陸君啟明惟厥一
人焉抑復有進者聞啟明最靜默身康家泰矣且恬然

不用外物飈炎其中金人三緘匿大銛於至質其潛脩
密養將必有自得非予所知者以是主張勝居標揭靈
域優優乎卓哉何有於予數十語為姑敘致之蓋其子
吳學官弟子員鵠來請之

慎齋記

有雙舟偕濟川甲乙操者颺鼓濤怒甲濟乙溺焉甲櫂
杓楫碇罔弗飭師兢兢各備事乙否也二人者患疾候
證一醫一一死一生生者飲其藥遵其戒余服涼燠興

居用時節食禁色死者藥而已矣是何也慎不慎之辨也昔者吳越並有國吳亡而越存越慎也又有甚者齊桓公始伯諸侯萬國推長而末淫蠱以死潰骸二月而斂唐明皇初治齊貞觀卒遂乃困而殂此二君一人而後先殊亦由是已故身與家國天下無不生安於慎而死敗於不慎凡慎之道具經傳事效列史集不可勝道人莫不知之習焉而弗能用徽人孫武求予記其婦翁程氏慎齋者予亦未識其翁能稱果能用以否然而審

其自有可言者翁名讓字廷敬慎齋其別為號者武又
言其為人簡默厚重夫讓敬慎皆一道也然名幼取諸
父字賓以名起固望而未卜者若至自號乃志所趣行
所安豈以無所得而苟稱之乎哉因其稱而求其行見
其行而知其人藉白茅繫包桑意城瓶口不出戶庭廷
敬亦誠善美矣乎武又言程自篁墩遷率東六世祖神
叟有方山樓朱風林為之記廷敬居既隣方山亦建松
雲樓以繼之其有構繩武以保澤蓋亦慎之推也於是

翁之為慎志日益得業日益固而名將日益起以永其
家聲也夫

從一堂記

皇帝若曰為國在振綱常風民有以節義孝順著者
所司以聞蘇州衛奉詔言於巡按御史故衛士楊貴妻
唐氏二十一而嫁二十七而寡祿厥遺孤子女清等三
人守操嚴苦於今逾三十六年合官格請表門以旌如
制御史下其事於府府與衛交覈覆驗具實以復御史

御史乃與府衛臣各保明以聞詔可下有司如請乃正德己巳郡命為表樹第前其署曰貞節之門於是清且強矣後數年作堂以奉母語其友臣允明乞名堂而系之言用侈上恩曉子孫世世葵藿于天王允明日唯表厥宅里樹之風聲書之言也婦人貞吉從一而終易之教也肆我后勅天之命以惇典庸禮我邦臣工將順皇典以溥澤勸衆節婦峻完天明用迪于壺爨清事母孝又慎修不隊毋志若事以及於署紀允明因友道以敷

言謹援易義題之曰從一之堂於戲君臣夫婦父子朋友交發兼盡五典備飭以享于唐虞若此惟楊氏之有維楊氏之光迺拜手歌頌式銘于其堂其詞曰

寒霜矯節皎日全誓歸猷承后肯構懋嗣臣友紀綱敢効勒記尚幾類錫天明不匱貞吉而終媚于天子

夢墨亭記

子畏天授竒穎才鋒無前百俊千傑式當其選形拔而勢孤立峻則武狹童幼所志以為世勲時位茂祿侈富

一不足為我謀少長縱橫古今肆恣千氏一日忽念欲
了其先人之遺望且以畢近易事遂乃苞錫坊涵萃神
於科第業閉戶一歲信步闡場遂錄薦籍為南甸十三
郡士冠人駭之而子畏自顧折草爾由益信人間事無
必煩智慮者當是時且以謂崇儔顯章宸金午玉階升
而矢流耳曾傲朕於閩之神所謂九鯉湖者夢神惠之
墨萬箇子畏謂塗楮畫素或但成細瑣藝玩殆溢儒腐
生之業亦何直許云是殆匪如響者也領薦之明年會

試禮署乃用文法註誤卒落薦籍人又駭之而子畏夷
如也去覈求神鈐天軌至理極事山負海茹鑽琢窈惚
於是心益精學益大而跡益放或布濩餘蓄以為圖繪
日月山河霄漢風氣烟雲霧雨花鳥樹石仙崖鬼竇竒
夫曠人俠子媚女樵牧耕漁墟市舟騎千形萬模皆務
為凌誇橫突峻屈譎詭周曲碎雜無不求詣各至妥帖
地必將躡古人之輟蹤惴惴然懼一失足俗駕當其妙
解超然冥會乃復以為業無小大神適斯貴是誠可以

陶寫浩素我心獲今此自四方而歸結亭闔門桃花塢
中目之曰夢墨章神符也謂獨余為可記陳前故以來
請於乎子畏自以為志暢矣神符章矣余忖度之其果
謂之然哉於乎然而不盡者也往者王子安嘗夢墨而
以文章名余亦嘗夢墨未知以何名審子畏之夢墨其
果以畫名哉墨之用獨畫哉子畏之文豈特余等亦豈
特欲勅等第哉子畏不謂符文以為符畫子畏格氣乃
果獨是哉以為符文余且謂不盡而又早於文者哉子

畏以文自居余猶進之有盡墨之用者猶為非子畏志之真也又以畫余冑謂之真哉設余第徇子畏云爾已矣當不畏人笑失倫又不畏神怒忽畧苟且何人哉神之祥子畏不唯是也必然矣然而人之志最易止止子畏之志無亦果本爾乎或是則不可不必進以從余如子畏不然又何煩以余文為哉

保和堂記

唐王殿下於承運殿之東墀構堂以為燕學之所名之

曰保和洞戶延室弘敞沈穆圖書列架琴瑟在御堂之
四隅翼以齋舍其名曰由訓曰秉巖曰若虛曰無逸堂
外嘉景羅布名其大者有六曰振雅曰采風曰文華曰
翰海曰椽床曰霜髓殿下朝政之暇則御于是蓋所以
養心典訓以廣睿學隆德業而保天命也有命某記某
聞之保合太和天之所以貞萬物也懷保咸和文王之
所以綏民也殿下英睿天成親賢地重勤兼四庫樂唯
一善陋炎漢之間平儷蒼姬之旦奭而且志崇索馭功

存宥坐洞神襟以納物謹周防以宅心於是新做湯盤
敬彰武牖觀其所名而天與聖人之心可見矣然其闕
淵算之所依測鴻稱之攸指蓋取諸孝典云在上不驕
制節謹度所以長守富貴不離其身然後能保其社稷
而和其民人者也夫保和之道兼內外而貫鉅細通上
下而徹幽明某試條其概焉殿下緝熙之餘飛神探賾
於是時也近取諸身玉體寧與夜氣清與志光明與遠
取諸人琴瑟戢與官府一與臣工謚與廣及于家邦民

樂生與黍稷登與郊壘平與禎祥興與屬屬乎邕邕乎
思之得矣行之獲矣金甌無疆玉燭輯矣書云欲至于
萬年惟王子子孫孫永保民此之謂也

寶善堂記

物至於必不可少也而後貴而聖賢之擇物則詳審調
酌寧近疎迂而要期於亡弊焉人之所寶大率存乎美
麗貴重罕有之間是故金玉之徒最之而聖賢之言寶
則必曰善舍夫美麗貴重罕有之間而更取於簡淡寂

寔苦彊之具聖賢豈哂人之性而昧擇物之智哉蓋意
期於亡弊而審夫人之必不可少者獨在此也比屋可
封之政行則珠玉為公具采薇啜菽之義建則金貝乃
廢物況務貨未必豐謀道未必寡苟能事事則富貴皆
完人窮達悉天民而靈於萬物之寶恒無涼薄之憂矣
不必財而殖不必力而備無事於假借無慮於匱盡多
歲而不亡呈露而莫竊有於身而身貴克於家而家肥
積於子孫而子孫吉被之人而人康以澤善之不可少

也如此吾非至愚安能收護其可少者而翻棄夫不可少者乎哉故取舍之間自不能不爾蓋聖賢精於擇物要期於亡弊也然從事者故寡則亦不知而已矣包山蔡進之獨知之不惟行之於其身而又稱之於其居曰寶善之堂間語於予請述諸簡子聞君志行清古食禮義而衣詩書者有年其為是非苟以知及之而云也蓋行之而效不能去之而他圖也予則能不是與抑有間者是義也君行之於身及之於物而根之於心足矣又

何事於屋廬表暴之間而疑乎贅也進之曰唯走亦知之獨念夫時遷世易則將容有墜忘者唯若是則使彼仰瞻茲堂留訓赫赫庶幾乎睹牆而懷堯睇洛而慕禹使茲堂為蔡氏命脈所屬而歷代猶吾之身焉耳嗚呼審然此其志又行之無窮而堂之力益厚矣尚何以贅疑而已諸嗚呼予又能不是與

燕翼堂記

闔閭北城外荻水之東自宋王氏所止中更消息居業

非故今日隱君元禹倣以克辟建作聿成中堂五楹七
介其袤十丈八深十二高二十二尺容中三間壁東外
翼西格合為閤室重疏崇廉脩美夾延其餘屋稱之所
以致安親尊止息心體別睦宗屬省牧肩系宅有家之
典停詩禮之具浹倫友之通往寓遐曠之風氣者也復
又總萃旨理豫備憂虞法規先民取義詩人歸名正堂
謂之燕翼焉弘治五年予詣訪公公之二子攀求銘戒
夫經營以振先者孝人之志也因效以垂功者長慮之

教也知志而思永者述人之善也附物以立道者智者之務也名義之宜安敬之訓講玩明熟居然無煩申矣是故新言每宜於警耳近指信可以起心故日新者以盤洗濯之類也行德者以帶動服之屬也故公之立旨主於垂後二子思承前業鑒茲堂乎非柱則不立非棟則不架非題楹椽椳則不連非牖戶則不通非榑榼椳楔瑣細則不完非基則不容非室閭廉美則不尊巨碎之繆施隆卑之倒安上下之失宜其豈以成堂哉二子

求燕翼之術在堂而已矣且夫棟柱之羣用為室之事也室非能自為皆公精神心思之所經至而出之也稱名之本繇此而已二子審之彊勉之詩曰子子孫孫弗替引之此之謂也

懷振堂記

詹氏先中山人國初以功授錦衣衛指揮後從駕遷行在府軍衛今襲任居北都者曰輝府軍之從孫曰濟字澤民居吾蘇久矣其為人年壯好脩澡躬暴名不肯落

人後其勉義勗惠求符契其名若字者亦久矣比者慨然以懷振號其堂識者詰之澤民曰吾嘗誦范忠宣對文正公語因寤寐郭代公之為人慕焉而欲希希焉而懼遺故竊即公之名而寓以懷蓋謂稱之弗切則志之弗專云爾非敢僭且褻也詰者賞之澤民因與之來謁予以記請曰幸託諸文筆以厲吾力云噫斯道也今也或是之亡也又久矣幸而得澤民不亦善乎且為是者不必以事以其志也亦足以醇彼澆醜矣今而事又然

不又善乎大抵今人之病於是也非其獨無仁愛之性之於帝降也是其於貨賄者其生之也孤其為之也劬而其為計也吝以愚故用之也自弗能以舒矣如代公之事非智仁勇之兼具者固難矣夫於乎在文正且未可先決忠宣忠宣亦且未能必時人之有也而況於他乎況於今日乎今日之從事也蓋必始乎激激久則利利久則安故曰夫仁亦在乎熟之而已矣於乎郭代公果何人哉予深以望諸澤民澤民力焉

賓山堂記

葉君民服居具區東山之下其人溫澤流達知其得樂
水功也他日以其堂記請乃曰賓山詰之蓋以居藉山
為東道主而志藉居以發故云爾民服因問子宜否子
曰靈神之區所產多傑特而傑人者亦必擇勝境以居
人卜居居助人宜哉取居以目人也今夫系土石附枝
葉嶽岩葱蘢拔地而黨天宅仙鬼而興寶箴具區之山
又東南表然者而吾子舉數十棟宇六尺之體以臨之

其小大不倫而賓主適相當猶一客據座而主人雖王
公子姓擯從千萬人無加焉則子之賓山山不得而辭
主雖然賓主猶名也子達者子畧名實為子廣言之子
以先有山也而自待以賓不知茲山寂寞孤處千萬年
而今始遇子以契以名庸詎知山之不以子為主乎又
從大塊者觀之子無族屬於山山無倫品於子庸詎知
夫子與山皆可賓乎皆可主乎而又況乎名者實之賓
而又況乎言又主乎名實者哉皆癭疣也子歸勿觀於

數十楹外土石枝葉暝視塞聽窅窅兮其凝其盲必別
有一山嶷然為主於子者

寄寄堂記

扶風馬世用家太湖之洲山川之與身魚龍之與隣眇
草木之附著猶曰奚其凝也余其寄他日以家終不能
脫城府而營營別家焉又曰奚別於湖家余其寄即大
書二文為堂名云寄寄謂予曰知請契諸是非迷之文
嘻余斯人者之寄者之特者也果知之馬氏發其一發

其二未發其累轉而無窮木寄土工寄木構寄工曰家
家寄湖湖寄城曰別堂寄別名寄堂曰寄寄吾將累轉
至於我我固無寄乎寄諸骨肌膚毛骨肌膚毛奚其寄
故寄亦寄也寄寄名者寄寄寄實者也統名實之致會
儒老之趣賢馬氏之鑒開方來之績余謂馬氏宜無察
乎寄無寄而察乎寄無寄之名實如察骨肌膚毛之寄
名而任亂其實則能以肌立以膚毛內傳輔其立而以
骨馬外包裹乎故亦終無能焉是名實之辨也又及于

堂家湖城邑天地也誰不然故馬氏察寄名毋亂寄實
馬氏契于余余必進馬氏馬氏進者與馬氏不止問知
馬氏進也旅氏之山有小石焉羣飛止之人旦朝逐止
之名名之鴉鵲鷲碩鵠硯鷲礎歷者瞑而不覿明日羣
飛之長止之遂名之曰鳳凰之臺弗覿者因取懷而歸
珍之故石一止羣而名生名美惡殊實定而愛憎生羣
名者寄寄名也羣飛者寄寄實也寄寄名者人可亂也
寄寄實者我不可亂也故可亂者寄寄之寄者也不可

亂者寄寄之不寄者也故馬氏之知在寄寄之寄寄寄
之不寄知寄寄之不寄而馬氏進

懷星堂集卷二十七

欽定四庫全書

懷星堂集卷二十八

明 祝允明 撰

紀叙

存義堂記

故崑山費君宗善負義氣所勇為事歷歷振人耳少贅
于張婦翁死畢其喪植其孤嫁娶其士女乃去自居居
廬器服一不取先事其兄甚弟兄數勸歸君謂兄殆不
忍吾寧欲以歸裕吾乎吾何有于是不從也父產竟不

霑毫毛比兄卧病永平君亦客通州去省視兄則死矣
君哭之累絕而蘇咽閉不能食扶喪至通亦竟長逝嘗
客湖湘寓隣李生以事坐獄君矜之輒哺之食并哺其
家其家獨有艷妻人疑君意在是也李且出亦謂然爾
感之既甚一夕挈妻來謝請以妻酬君勃然斥去其平
生事可見者如此它固未悉也既卒遠近以義稱之干
舌一辭焉君有子紘為郡學生文行兼美甚稱君因構
堂名之曰存義尊先烈也作者為發已富紘特屬纂記

之筆於我嗟乎石而介水而流性也染而蒼染而黃習也故性於義孰能水其石習於不義孰能石其水寥寥古今獨稱展季王徽之彼何人哉後之稱是踵費可也抑絃所立如此其大達而揚顯之也將天意自定者耳我不敢佞

嘉靖堂記

去闔閭北郭二十里許黃埭之西漕湖之南道遙湖之傍有美壤焉予友顧君朝周家於是通川經緯沃野環

行城市非遙而囂塵夔隔軒冕時集而騶訶不擾誠郊
居之最也邇者重築新第門巷舒邃垣廡寬雅崇堂中
建無雕績之繁縟而宏敞靚深莊昉章言言如也于
于如也登之者耳目朗潔意氣寧謐有以消樸鄙而滌
喧煩焉君署之曰嘉靖且屬予記夫嘉美也靖安也書
曰嘉靖殷邦斯堂則誠美且安本此以署之固甚宜然
堂以嘉靖宜人人則宜之宜而不法之則不盡人不盡
人人且不能為堂宜故欲宜者在法今夫堂之為嘉靖

者以其高也法之以高吾志以廣也法之以廣吾度以
深也法之以深吾思以莊直也法之以莊直吾心以彊
幹也法之以彊幹吾行以虛明也法之以虛明吾氣以
羣材小大不遺位置有定也法之以周吾百行而有恒
每法之而居焉以睦宗族以樹綱紀以施條目以勤作
息以飭威儀則固不美以安矣典禮行於斯而序聲樂
奏於斯而和文學成於斯而著操履寓焉風氣宅焉聲
華起焉安常處順之間收禮樂教化之懿尚逮於方來

子子孫孫弗替引之堂之為嘉靖大矣哉君才局英邁
尚志脩業自期高遠闢齋堂隅積書滿其中以肆蒐討
所得日深其豐獲大就得斯堂之助而與堂交宜也亦
審矣嘉賓日覲敬恭周旋秋秋提提以鬯于文必多有
銘贊賦歌以相堂事而堂之為嘉靖益廣矣

保堂記

沈君惟時以保署堂乞允明記允明日保之時義大矣
身無以保將恐隳家無以保將恐摧卿士能保以有其

位諸侯能保以有其國天子能保以有四海保則得弗保則失保者盛之始也興之繇也安固長永之基也保之時義大矣然求其切者身爾家爾保身之事二其道九保家之事三其道八德也躬也身之事也倫也聲也物也家之事也是故信以保言敬以保行仁以保心義以保事智以保患是之謂保德內視保目反聽保耳節食保口安重保四體是之謂保躬倫之保存乎親義別序信聲之保存乎積善物之保存乎儉勤保之時義大

矣事亦繁矣然其要可知也君子欲保其家先保其身
欲保其躬先保其德身治而家否者鮮矣德脩而躬不
寧者未之有也嗟夫保所以守其固有而永其方來也
惟時之族為長洲甲所謂五事勿庸論其遙胄蓋自介
軒保之以詒同齋同齋保之以詒石田石田保之以逮
惟時惟時知此而存之心署之堂託之文章可謂孝矣
然保之難而保之終尤難惟時其必知所以終其保者
矣朝馬夕馬陟降有嚴愛護而仰瞻不猶見羹牆佩韋

絃以自免於弗構之愆者邪惟時之意遠矣

雪堂記

堂以雪名何進人而天也雪天也宜人也天人判矣而一之何其本同也其同也柰何三才一陰陽也然則人天地中也清陽濁陰不聞偏受以生而謂可以一於清何理同而氣異異天人以氣形清理一也清理一濁亦理一必欲去濁而即清何陰陽類異而美惡殊清美也扶陽抑陰屏惡而尊美欲為君子也雪則何以為清何

以為陽雪雨雲皆水而雪因寒以凝從風而成陰極而趨陽者也是故雨重而雪輕雨濡而雪燥雨柔而雪剛雨黑而雪白凡以趨陽故也陽則清固本理也夫人則曷為而比於雪之趨陽乎人自強則輕去染則燥力善則剛寡欲則白皆治理以帥氣去陰而陽之道也故鄭氏之稱雪堂君子取之取其君子徒也鄭氏名祐字惟恩吳之沙頭人美質好脩白責素節是故君子取之

葛秀才小樓記

將以宣豁風抱紓和志節則必得長津濶野以極其大
將內觀心語玩索理性則必得窟室奧寢以極其小若
夫欲大可放欲小可斂欲事崇廣而遐曠自致於尺寸
之地則以據境之要乎葛秀才家葑門外臨河構重屋
三間間濶不十尺深不二十尺北窻一開則有十數里
野意樓面壬背丙危城引目而遠轉有假於峰巖脩隍
浸趾而廣漾疑意於洲澍丹霞麗譙清流白鳥風牖吐
納月榭迎餞此其外也一几僅容數十策而上下幾千

載事理者備一榻僅息一骸而能彌綸萬務者具食不能方丈而觴者樂題榻不敵於從室而自外百步望之可以指而趨此其內也秀才居而自樂之請予記夫秀才居小而得大讀書於樓而求用於世是秀才以一心治百政於異時者茲樓比也地要而得多學要而功博樓之助我大矣哉彼若分情魚鳥結好川石為若不類所當者乃不然致用推發存乎養中是故息焉游焉半歲脩之力浴沂風雩尼父與曾氏子

訥齋記

子曰君子欲訥於言訥亦多狀焉當語而已者心欲語而口不克者能之而以他止者皆非也已者狡不克者愚他止者詐皆似之焉耳奚訥乎必其時而言時而默簡而理達訥而中節焉斯訥道之貴耳以此守口猶有成虎鑠金以亂物者徽羅惟周以訥名齋乞為記噫時方鼓簧子寧緘金鞞大鈇於無形匱龜玉於莫覲囊神穎於不試履儀秦謝華士卻少正卯又進焉求若子騫

之有中望元聖之似不能而想象乎蒼蒼之何言斯訥
之無弊而至善有如不然惟訥司牧而無計其宜不宜
焉將愚狡與詐三過者集乃將無逃焉而又何君子之
有惟周誠厚易良操已與物渾焉斂焉足以存無名璞
泳鴻濛津其訥不過也蓋抱真守天求益師聖賢者耳
予以其訥志甚銳求其理過計焉為茲談答之

審齋記

昔讀莊周曰水之守土影之守人物之守物也審而耳

目之於聰明心之於殉也殆以為名言已而曰未耳目之聰明則物之與物也何審與殆之反別蓋無若陶唐之語審殆也曰人心惟危道心惟微惟精惟一允執厥中危殆也微精一審也執守也莊舉揉而堯精雖周末瑩然審自二科有審也者有審之也者本然審者也力而然審之者也本然而然聖也本然而不然而知然而力然之賢君子士也是審之者也審其審乃自審繇士陟聖今之務審者宜爾矣晉陵胡君志於是遂假居齋

以名愬力遺焉頃為子學道期有長之者嘗問焉子謂
君於是其迹者當得之其根委剖渙如堯莊之純揉不
可忽故聊為疏之跡者當得之矣君曰曷為跡言審乎
誠偽行審乎善惡視聽審乎正邪取予審乎義行蔽審
乎時持家審乎禮與人審乎恭御世審乎法誣信審乎
天命君曰唯唯信矣將學而未能子曰此君之所以能
也書斯言齋垣君亦更審之

斐齋記

斐為字從文非諧聲許祭酒謂分別文也引易君子豹
變其文斐也按今文作蔚虎變稱文炳豹乃異虎蔚亦
殊炳其初作斐固以分別為義又論語斐然成章徐散
騎亦以為分別之也宋儒直云文貌鄭司農釋衛詩有
斐為文章貌小雅斐兮為文章相錯周禮斐色注為采
貌大帥斐者文采分錯而可觀之貌也太學顧君朝鎮
以斐顏其齋意亦主於文厥身歟夫文大矣古之曰文
者動乎四體宣乎言辭懿行暢諸躬天典粲諸家而禮

樂聲明華諸國與天下皆是也其著於漆簡紙筆之間以布治化以述聖道以紀世史以詔來學以至乎言志敘事凡號為文者文之一端也必咸備而後全古之人得其全而一端者存今人之必由其一端者以求其全一端者莫大乎十三經莫備乎十九史以極於百氏言斐多矣即經之言亦有異焉學者宜始乎成章求裁焉而中乎赫喧瑟個則發焉以終乎豹變斯為斐之道也貝錦之華乃所戒焉朝鎮抱質昭穎而方力乎是其必

探性道之根咀理義之英擷辭章之藻學聚而問辯寬
居而仁行務令五品順百行懿容貌莊威儀飭辭令美
如金既冶如玉斯琢卿雲絢乎篇章春葩爛乎行墨其
文分錯而可觀則斐道得矣異時庸顯于朝敷施益弘
鳳儀虞廷麟遊黃郊於是斐效乃益大以全余也不足
以盡此朝鎮蓄書滿齋中居而求之日衣錦也以朝鎮
有請勢且銳邁姑以是為執爰

恬隱齋記

恬隱者黃巖戴先生齋名也先生名璉字尚重其先由
閩遷台世擅詩名宋東臯石屏父子尤著諸孫如竹洲
蘭谷突軒東野漁村秋泉樗巢介軒纍纍不絕今家太
平之崙山先生讀書龍鳴山避喧菴中以此自呼或寄
為齋名觴歌自得莫測涯際行年七十有六鄉邦倚為
瞻式主器先生於允明有師道使為記之蓋位南都太
學丞

學丞

闕

人之情動勝靜者十九靜勝動者十一隱靜之至也而

復何有於恬不恬耶世下矣名至靜者而猶有不恬不恬而猶曰隱妄也不恬而曰隱者妄吾固不能忘恬而隱也不恬而隱者妄則恬於隱者誠至矣恬於隱者誠至而又何有於標著乎是亦將固其至者而已欲忘恬而先之者也故觀恬隱之稱而知為真隱知為真忘恬者也至矣哉戴先生之號恬隱愚不能贊焉繹而為歌敢以獻先生隱乎隱乎奚其岐恬乎恬乎隱之不欺隱乎恬乎繫先生之全乎

坦軒記

賜僉蘇州衛指揮使司事隆亭華君世宏以坦名其軒
乞記於予坦安也平也嘗得其義於孔子之書曰君子
坦蕩蕩循天理而無外慮無往而不平也君子以之又
得其義於周公之書曰履道坦坦幽人貞吉居中安下
履道而正者也幽人以之又求其義於天地萬物皆然
也暑寒之代序高卑之相因未嘗偏極而不反惟人也
可不坦乎書曰王道平平詩曰周道如砥由天子以至

于庶人有可以不坦者乎彼不然者秦政漢徹以求仙
并夷病天子之坦七雄劉漢之徒以逆紀兼類病諸侯
之坦儀秦鞅睢莽卓之屬以攘位竊國病公卿大夫之
坦王衍宋齊丘之輩以矯名竊利病士之坦以至乎蚩
蚩之氓干紀厲衆越分以自恣者病庶人之坦皆以坦
為不足而抗之張之以極其私欲者也然卒之有不賈
禍而并亡其坦者乎故坦不可不由也今華君之才豪
敏而果利行之必達其世以孝義傳襲甚華其身受國

家三品爵冠弁金紫昂然榮其家廣第宅連阡陌厚生
用無欲而弗遂自他人視之高遠濶大不可易得而兼
有也而皆君之常耳使君不自安之而每欲凌跨超越
以為快則未必不能而違道遠矣君乃不然唯執一坦
以自居此其盡道迪吉度越於人遠甚故平定冲易以
坦其心敦本務實以坦其行恬澹貞靜以坦其志典雅
誠信以坦其言儉勤莊睦以坦其家謙和直諒以坦其
與人彼高岱嵩吾坦夷壤彼危太行吾坦康衢彼深九

疑吾坦曠野以是日用而自然其心寧其行達其志申
其言從其家肥其鄉邦重而尊之一身泰康百福應集
蓋坦之效大而遠也本如是而君獨能獲之君殆知天
地萬物之道而周公之所謂幽人孔子之所謂君子者
乎迷之以贊於久

招隱亭記

招隱亭在無錫之甘露作之者曰西野華君文潤文潤
抱局疏雅含薄風素高居遐攬同心者稀於是寓劉淮

南之志於茲亭焉人莫不高之于也感夫安以王孫之
華赫不足以尚其曠逸之想故使八公者造二山以諷
引沮溺招援黃綺孤標靈韻激興後來自是以還必斯
為美或雲卧以終身或拂袖於中路任南董者傳隱列
逸與勲勞以齊芳信高尚矣抑皆執是則將蔑禮崩樂
廢養亂刑五臣遐舉十人行遜唐虞不就夏周不興而
后我獨貴乎聖賢之情其亦異矣嗚呼蓋嘗徐察而深
求之然後知君子之居心御世所執微矣蓋曰三代以

還極亂可隱極治亦可隱也三數君固已有說今君臣
明良時事泰清而文潤為是則所謂極治之隱者也百
僚克備績効既徵揭吾一人獨見林下以助化贊理默
與弼教致世者同功焉不亦可乎故唐虞有巢許周有
夷齊先民予五臣十人而不奪四子則招隱於治世者
可知矣故曰道並行而不相悖文潤殆知道者非邪既
叙以助志復為詩琢亭石時歌而招馬詞曰

山有木兮木有枝木山之陽兮山木賁思亂峯巖兮樛

單柯兮矯窅君不來兮木以老

於物亭記

長洲郭汝載家城北綠雲里汝載治士有恒心恒產去
家東鑿疏壤為沿循治內為副隄築內為中洲內外隄
匝以嘉木柳枝桃花緋綠互煥亭洲之中以主張衆美
謂生意無若羣鱗之繁且妙也名亭以於物僕游焉而
樂汝載曰吾不為賓謀也者而為是吾樂而之是而樂
益憂而之是而憂損吾謂魚獨吾樂今而後知其衆而

斯名之宜夫子曰然執道以御物道不精失物情微物
於往者之於道也則居可知矣古之言魚之樂一也莊
周公孫僑子思之徒與周之為雅者二其為樂一也夫
枯轍旱陸易煦沫而斗津吾遽然樂其樂而況方舍繼
縱遊乎伐冰之家之池洋洋悠悠又況躍沼于淵極與
翔摩戾空者咸察焉又況泳洄德涯遨盤道川微鱗巨
鬣左右克盈其為情無以尚之者乎故稱魚之至者古
今底于平王子善稱哉然吾始樂之今有憂焉魚吾之

盡性皆以遇聖人今魚遇聖人處乎沼情盡耳吾與子
生聖人時被聖人教將求為聖人用能若魚之忽然無
為乎若是則負聖人矣夫魚滿沼賢才滿天下吾與子
於是不可自居不可以滿自居則驕驕則傾
恕則怠怠則斃傾與斃非魚所知吾與子罪也故於是
當脩焉無作魚羞子曰諾子曰夫魚且勿可羞而況室
居名言之張彥乎汝載瞿然請記之

清兮亭記

居天下名山水性氣不足以充發之且當與閭坐市立者殊科矧抱質澄雅又知讀書事隱是境之為其專且名也亦不辱矣洞庭天下名區也金作之山玉作之水不肯受塵土一點羅氏居之哦山嘯水吞烟吐霞衣流冠石作一亭儲羣勝號之曰清兮來邀予志心地之接者於亭相噫去孺子二千年不聞洞庭有擅茲名者蓋天勝不遷知契而取者自寡或有之矣而我未之見也未之見而昉見之又烏得而忘言也噫母緇而衣母棘

而足吾他時占子舊纓當無一絲髮垢濁

吹綠亭記

錢氏有大圃焉一方池居前旁為亭面東軒豁疏徹不受一泥塼入每坐欄臨流四簷草木生氣菊合翔禽交呼波菱水蒸膏碧亂擲游鱗潛鬣時時撥刺出入水面水痕散而為羅激而為珠澄而為練一坐便廢晝夜酣暢之餘取五柳先生巾漉蘇州蓮花白時嚙饒州一白醖旋入池采菱剥蓮葯飽啖手自垂綸釣鮮魴魚洞庭

橘子皮酒烹之以薦抱阮咸作一兩曲熙熙而醺冥冥而眠仰面看碧落高歌歸去來歌已長嘯流雲數聲却夢與點也接與沂雩一境然後寤亭之趣大畧如此主人澂徹二兄弟得之最深夏日予過之以為趣頗分請名亭而文之予大意以為亭趣惟有生意故勝遂用韓吏部詩語摘二字題之曰吹綠

楊氏祭田記

曲禮曰禮從宜禮器曰禮時為大順次之稱次之禮之

重於祭久矣若夫士祭之田其在於王制既曰有田則祭無田則薦而又曰圭田無征在於孟軻氏之書既曰卿以下必有圭田五十畝而又曰士無田亦不祭然則田之有無未決也觀周禮地官任土之法有士田圭田鄭司農以士謂仕謂仕則賜圭田然則圭田亦以賜否為有無與夫制之存乎籍者如此後世何居乎自井田廢而禮隨以遷近世朱氏所述以立祠堂置祭田冠乎有家之四典今士誦法聖賢知重於是矣然必執而望

之上之人之賜乎則禮無時而行矣蓋聖朝調酌古今
仕者祿而不田至大勲庸之賜間出焉亦先王意也士
於是得為而為之弗禁也不得為而不為弗讓也得
不得者力之謂也然則士於是得為而為之亦近於所謂
時者歟近於所謂天地之祭宗廟之事父子之道君臣
之義而順者歟近於所謂君子大宰而祭謂之禮而稱
者歟皆從宜者也亦為之而已矣嗚呼吾獨慨夫為之
者之寡也夫得為而為之上也不得為而為之次也不

得為而不為又其次也得為而不為斯下矣某郡揚某室既侈富禮典周舉屬求予記其祭田夫人則知祭矣祭而以禮者寡也禮而知以時又寡也禮亡時得而能調酌建置以不失先王之意不悖時王之宜又益寡也是所謂上焉者其可嘉哉蓋世以其得為者而他為焉又多也不亦重可嘉哉雖然萬物之情外必自中某之所為蓋不特是樂其發慎其獨所謂外心內心其必能交致矣夫田之度籍之石陰

南山隱居記

孫居潤殆五百年當大江之濱嚴莊之郊依山北而家
天順中故處士大章有三子各授以業季氏公正君得
山南地地廣而蒼君時壯且敏視其地若玉未琢也力
治之薙其蕪夷其埴壚其埴整其繚築其領為第易其
幅為疇藝其裔為圃第之屬敞而為堂密而為室重而
為樓虛而為亭敞者主之餘者從之其制無飛題藻績
之靡其貯惟琴書耕織之具疇之屬有畝有畝有溝有

渚其種秫秫麥菽圃之屬鑿曰沼壘曰山障曰籬通曰
徑其植柿栗桐漆松杉竹蔬麻泉大率居尚樸固而等
威有章物可游玩而材實給用美足暢適而規可示後
於是地事乃盡而安處焉犁鋤共簡編並持樂道與治
生偕事子姓日侍賓朋時集安之而不遷享之而亡作
信居室之善者也君標其稱曰南山小隱相國長沙公
而下多為題署復請予記夫深山大澤惟材之依故嵩
華有虎豹而蟻封無椀椅然得而不知居之燿華於郊

饗啗於野其招伐而就禽也立至故周顛種放中道而廢以為其地羞此又地之依夫人者也惟知道者得焉而守之大穎濶力函擁不散乃治地以自宅心綜而躬理盈而為虛泰而為約卒食其報積於尺寸之力而收於億屋之獲樂於克贏之享而免於悖出之虞得於今之尋常而流於後之無窮也此則為隱之道而獨君以之長江大麓非斯人其疇依哉君有二子方育皆植志媚學拔類材也方領薦於鄉育業辟雍行且爭驅一日

千里此又山川不舍者子特從君請也本其雅意如是者而言之

石田記

君子之心望於世也廉而自治也勤其望之廉故甘為未輯之瑞治之勤則不寧耀其生耀無窮焉蓋有不度而試者以杖為楹以撓人之堂殿君子視人恒若餘視已恒若虛每退一武曰吾弗彼若則弗可以試非謙也其自期者遐而更覺其斂而不知其已度越餘子遠矣

伍員之喻石田以弗稼猶無田也沈先生則弗稼者與
其以為名所謂君子之心也先生者巢許其居服而禹
稷其腎腸既自退曰吾不敢豐望於世為是名已乃去
以道自治削蕭莠扶沮洳揭其堅白以對日月爽然風
塵之表璆琳琅玕從厥自生自潤吾亦不强自鍵閉唯
不為太倉玉食之需安於寬閑之野壽於寂寞之濱焉
耳吾何慙乎哉或曰審爾先生亦獨潔者矣而亦烏乎
耀矜無窮與余曰先生之植志操節也不可闕吾試與

若闕其詩非孝忠節義也無觸於膺無寄於聲油油乎
茁元化之嘉種粒烝民於終古其不類杜少陵與杜之
位不過一員郎無片事自振當時而自方稷契人不笑
之以詩史耀也而先生又烏乎憚哉先生之為斯稱也
在少而小子言之於其老凡言諸先者當以期今則定
矣敢以垂贊無止

東山竹屋記

國家有考成股肱之臣曰大理卿金壇虞公歷輔祖宗

仁宣四朝率典憲弼教用平慎閑雅以格于人既没而
遺休垂光肆達于膺人實覃且訏其曰邑黌之彥來鳳
君孝秀凝特益振世華用維紹先開來者是承是荷嘗
割父授口分之業為祔田繼兩走闕下上疏請明先公
延賞之典不報請賜謚又不報猶以言直迂權姦謫東
裔踰年天子誅姦賊宥流人來鳳得釋歸辛未春月予
邁于京師唁且慶之視其氣浩然直熏然克也問來故
來鳳曰遇明天子將復申先公事予曰不其懲歟來鳳

曰吾以直奚懲乎抑先公之道其豈和王之類顧不能
三獻哉予甚壯之明日以其所謂東山竹屋者求記亦
自己言言辛酉之秋由下第歸游莊城之東得其地
勝有山水之雄秀竹木之茂悅因旁竹結屋而居以討
古今索名理養節氣於是有朝陽之況虛心子之稱且
上尋先公有玉雪之軒亦以竹喻玉以溫栗雪以潔先
公以喻吾以指言其將因地以獲先公之心獲其心尚
武其道云爾凡其言之大校若此嘻既盡之矣予不足

助來鳳所不能忘言者悅來鳳之氣也夫玉所以溫栗
雪所以潔竹所以似二者所以具是姿性節操先公與
來鳳之所以有取之皆以得此氣耳至如衡古今而觀
之瑟兮憇兮赫兮喧兮衛武之竹也邦有道如矢邦無
道如矢史魚之竹也筆則筆削則削春秋成亂賊懼孔
子之竹也其在于今則出諧筍韶處光汗青惟虞氏之
竹乎此殆可以贊來鳳之志彼其留眺於綠槍金鑠之
狀注聽於瓊琚玉珮之韻與東山之佳衡宇之適以極

語言風詠之工者可語衆人非所以記來鳳

眼空臺記

鴻山自棲梁伯鸞以來居者不易稱可知已樵豎耨夫
何有於地乎逮西野華公德始能居之亦始能稱之闡
古構新名其特勝者至十有八嘻盛矣哉山於是為中
興其間曰眼空臺者惟吟眺之所間嘗以語余余想其
燕閒之時觴豆之隙哦興橫生活氣欲吐則振衣而上
於是衡睇六合冥詣太始不見有一長物雖山川之流

峙草木之榮瘁禽蟲之鳴寂奔伏以至於烟霞之五彩
日月之代明萬有錯於前而曾不滿吾之一瞬故舉所
見而空之此其加於人信遠矣然而空有之際取舍之
間而是非判焉公察之久矣故自其有而論之則日用
百需鈞戈之微亦不可以去自其空則混沌七鑿宇宙
之大亦不可以執譬諸飲食方食為有食已為空如不
食以為空不可也食已而猶執之亦不可也蓋萬物皆
備吾身而初不物於物乃君子之道也此言不可去者

也又況有是非者介乎其間鉅橋之粟於紂為有而武王為空時則主於空居延之節於蘇武為有而李陵為空時則主於有故空有不在物而在眼不在眼而在心不在心而在理不然無擇而畢歸於空西方之言非公之意也故公之所謂眼空以道為樞者也古之為觀者若山淵之平莊周惠施之眼也是齊也非空也塊岳杯湖李白之眼也是大也非空也二子燭道未盡故齊之大之而未至於空若公於是無必乎齊無必乎大其視

夫山河草木之屬流而自流峙而自峙以極於萬有之積而各具自然竟無一事凝塞於吾中者而又矧乎傷道敗德之初贅疣枯絜之具齷齪瑣屑膠擾煩亂交病吾心眼者哉九霄上憐八紘下陳曠然吾兩瞳子唯見一道道以眼著眼以臺著不可謂臺罔功予不佞請發公之道以鏡于臺

菊花莊記

蘭溪伊廷玉家有菊花莊以其道行於醫寓志於是云

爾判太倉州龔君為道其志幸子記之菊事亦大矣有菊德有菊操有菊趣有菊功舒而葩散而葉緋綠而色芬馥而氣本乎地者所共菊無貴也德而黃中操而後彫趣而幽野功而濟人斯菊善已伊亦特舉一隅吾請為徧徵之夫植焉名焉而玩游焉以助德焉厲操焉道趣焉輔體焉一身之菊莊也德孚於倫屬悉由中焉操立乎上下咸有守焉趣無弗適而體無弗康焉一家之菊莊也一家然而一國具其來至於康疲瘥活天札州

里之菊莊也推於通國通國之菊莊也廣之天下天下之菊莊也又至于反收內卷以小喻大物喻道則百行異而私欲亡君子進而小人退善人多而惡類消中國治而夷狄臣陰陽和而萬物遂亦人與國家天下與天地之菊莊也已小乎哉福建憲僉前翰林章公有記亦引厥旨矣龔君之命不可已且申之云爾伊君亦然之乎倘然之幸分我一落英餐


芝庭記

葉君明哲之新居在太湖東之紀革始遷而芝產焉因
自稱芝庭主人吾師天官守溪先生為署二大字他日
就僕問記禎妖之談古今歧焉或曰猶影響或曰濶疏
至折諸聖言則如禮之云四靈春秋之書螽螟居可知
矣子衡觀其間不可決謂天之有意無意在也一氣流
轉或為人或為物其粹精者植出而芝動出而才秀非
無種也種於太和焉矣其間有人物相為徵應者亦自
不同有人未至而物先見者有人既孕而物斯從者有

人與物適相值焉者由君子言則可喜也亦可懼也昔
之名卿喜佳子孫之出其門如芝之生其庭高賢固然
而今吾得之是可喜也然而佳氣吾集能無迂尊承凝
之方歟必人與物偕而後不為吾芝辱可符謝公言少
當蒼蒼意是可懼也今葉君於是則信善矣其人恂然
恭冲然和藹然才且淑也而嗣者泳游潏波英藻粲發
可以襲桂馨奪杏艷是封胡羯末徒也則知而無事乎
懼一於喜者也既以為君慶且以佇焉而永之以歌詩

其詞曰

燃神糈兮翹吾庭粲吾嗣兮協厥靈友黃綺兮采巖坳
粲者起兮甘泉九莖芝兮芝兮綿脩齡



懷星堂集卷二十八